

tonio Trun metesse a l'incontro di star sul preso, *videlicet* che pagasseno decime; et parlato, il doxe, con consieri e cai di 40, introno in la parte. Sier Antonio Trun contradise; li rispose il doxe. Andò le parte: il Trun 40, in zercha, il resto il doxe; e fu presa la parte.

A dì 30. Fo consejo di X. Feno li capi per il mexe di lujo: sier Bernardo Bembo, dotor, cavalier, sier Alvis Capello, qual perhò fo 'cao di X per 3 zorni, ma questa è la prima volta ordinario, et sier Andrea Loredam.

*1506, die 26 junii in colegio.*

Che per autorità de questo colegio sia ordinà e statui, che *de cætero*, per i procuratori nostri di San Marco, prestar non se possi per modo alcuno alcun libro, che hanno de quelli dil *quondam* reverendissimo cardinal, *nec non*, con pegni, nè senza pegni, soto pena di ducati 500 a cadaun che li prestasse, hessendo tenuti li prefati procuratori, soto la instessa pena, farse in termene de zorni 8 restituir i libri havesseno prestadi, et in la instessa pena incorino quelli che havesseno de dicti libri, et non facesseno la restitution de epsi in el termine sopra scripto; sia *etiam* deliberà, che *in futurum* li libri prefati non se possino monstrar ad alcuna persona senza balotatione di questo colegio per i tre quarti de questo. 19, 0, 0. Apar *in notatorio* XXX.

167 *Memoriale de le novelle, che son venute per le quatro nave, che veneno de India, e intrarano in Lisbona, veneri, a dì 22 de mazo 1506.*

*Item*, che le dite quatro nave vene tute molto bene carigate de specie, quanto più potevano portare; e le altre de questa conserva, che sono cinque, restarno, al tempo che queste se partirno, despazate e charichate per partir, perchè el re nostro signor à ordinato, che le venisseno in doe parte questo anno, e serano qua, piazzendo a Dio, molto presto. E tutte queste nave sono de la conserva che menò don Francesco d' Almeda, vicio re de India.

*Item*, el dito vizio re a l'andata, quando andava, ha tolto la città de Chiloja a li mori, e à chazato via el dito re de Chiloja fuora del paexe, per non lo cattare tanto fidele e lial servitore, como doveva, per la obligatione de la sugietudine e vasalo del re nostro signor, in che era ubligato, per la ubligatione che con lui feze el ammirante de India. Amazarno molti de essi e meterno tutta la roba, e la città, a sacho;

in che se catarno grande richeze. E da poi dischazato via el dito re, e mori, fuora de la città, feze el ditto vizio re uno re novelo, e incoronolo con grande eerimonie reale, con patto e ubligatione e servire in tutto, ho che per lo ditto re de Portogalo, ho suo' capetanij, che ge fusse comandato, e stare suzeto per tutti li tributti, che per lo dito re de Portogalo li fusse posti, arente a quello che ha fato el vicio re, che 'l pagasse. E resta qui fata una forteza, de mure molto forte e segura, gionta con lo mare; e a la porta de ditta forteza possino carichare e descharichare le nave senza impedimento alcuno. In quella forteza resta capetanio e zente del nostro signor, con molta artilaria, e navilij molto ben armati, e con molta bona zente, si da remo, como de altri necessarij per seguranza de ditta forteza; e *tan bien* per de li se feceno e se farà tutta bona provisione neccessaria a lo reschato e forteza de le mine de Zufala, a fine che li mori non ge vadino.

E fata questa forteza, la quale dito vizio re ha lassato fata e compita in la partita sua de quello loco, li mori che erano schazati fuora, con recognoscimento de vasali e liali servitori del re nostro signor, perchè li paresse che era bene, a restare alcuni de essi in alcun modo, la qualle città à popolata. Li quali tutti, in presentia del vice re e in atto (*sic*), publico ànno recognosciuto, per re e per signor, a quello re, che el ditto vice re à messò per re, in nome del re nostro signor; e fece el dito novo re, e prometerno de obedire e servire in quanto liale e veritevole vasalo e servitore del re nostro signor fusse.

Esto moro, che a qui el vice re feze re, era persona principale de quella città, e sempre è stato veritevole servitore del re nostro signor, e a tutte le sue cosse veritevolmente à sempre servito, per la quale è cosa justa, che recevesse tanto honorato beneficio, perchè l'è bene zusta cossa esser premiato e galardonato, e a li cativi non pasarno senza pena.

Questa città è stimata tanto grande, come è Vera in Spagna, che sono una città, che fanno da 2000 fuochi; e tutte le caxe de essa sono posto dui muri, che se giorgino a serare de sopra, come è uno caxon de li nostri de vila, de pietre e calzina, e in essa se catano molto terazo; e tene de signoria 1200 milia per la costa, in che stano molto grande e ricche isole, e molto populate, tute suzete al re nostro signor; e sè de le altre di là del mare, che obedisseno questa città e isola de Chiloja, da costa de la banda de Zufala.

*Item*, da qui se passò el vice re a la città de Mombaza, che *tamen* è de' mori; è stà defichata in